

BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE  
DOM NARODA  
Broj: 02-02-1228/08  
Sarajevo, 22.01.2009. godine

## Z A P I S N I K

### **18. SJEDNICE DOMA NARODA PARLAMENTA FEDERACIJE BOSNE I HERCEGOVINE, održane 27. novembra 2008. i 22. januara 2009. godine**

Sjednica je počela u 15 sati nakon završetka 17. sjednice Doma naroda.

Sjednici je predsjedavao Stjepan Krešić, predsjedavajući Doma naroda Parlamenta Federacije.

Izostanak sa sjednice opravdao je Jasenko Tufekčić.

Prije prelaska na rad delegati su, bez primjedbi, jednoglasno usvojili Zapisnik 8. vanredne sjednice, održane 24. listopada 2008. godine, i Zapisnik 16. sjednice Doma naroda Parlamenta Federacije, održane 09. i 17. listopada 2008. godine.

Predsjedavajući je obavijestio delegate da je Kolegij Doma naroda predložio da se delegatska pitanja i inicijative postave na sljedećoj sjednici, što su delegati, sa 44 glasa za, uz tri glasa protiv i uz jedan uzdržani glas, prihvatili.

Nakon toga predsjedavajući je prešao na utvrđivanje dnevnog reda.

Kolegij Doma naroda predložio je da se u dnevni red ove sjednice uvrste kao 1. i 2. tačka - Prijedlog Zakona o izmjeni Zakona o budžetima u Federaciji Bosne i Hercegovine i Prijedlog Zakona o izmjeni Zakona o izvršavanju Budžeta Federacije Bosne i Hercegovine za 2008. godinu - i razmatraju po skraćenom postupku.

Na osnovu rezultata glasanja, predsjedavajući Doma naroda konstatovao je da je Dom naroda, sa 39 glasova za, uz četiri glasa protiv i uz tri uzdržana glasa, prihvatio da se prijedlozi ovih zakona uvrste u dnevni red i razmatraju po skraćenom postupku.

Administrativna komisija Doma naroda dostavila je Prijedlog Zakona o izmjenama i dopunama Zakona o pravima izabranih dužnosnika, nosioca izvršnih funkcija i savjetnika u institucijama vlasti Federacije Bosne i Hercegovine sa prijedlogom da se razmatra po hitnom postupku. Na osnovu rezultata glasanja, predsjedavajući je konstatovao da je Dom naroda, sa 41 glasom za, uz šest glasova protiv i uz jedan uzdržani glas, prihvatio da se Prijedlog Zakona razmatra po hitnom postupku.

Vlada Federacije Bosne i Hercegovine dostavila je Prijedlog Zakona o izmjeni Zakona o statistici u Federaciji Bosne i Hercegovine sa prijedlogom da se razmatra po skraćenom postupku. Na osnovu rezultata glasanja, predsjedavajući je konstatovao da je Dom naroda, sa 46 glasova za i uz dva uzdržana glasa, prihvatio da se Prijedlog Zakona razmatra po skraćenom postupku.

Elvira Abdić-Jelenović je predložila da se sa predloženog dnevnog reda skine 7. tačka - Prijedlog Zakona o zaštiti od požara i vatrogastvu – jer, prema njenom mišljenju, nije traženo mišljenje od osiguravajućih društava i od udruženja poslodavaca na koje se odnosi Prijedlog Zakona, a tiče se davanja iz ova dva sektora.

Drugi prijedlog odnosio se na 5. tačku - Prijedlog Zakona o izmjenama i dopunama Zakona o privatizaciji poduzeća (predlagač: Klub zastupnika SDA u Predstavničkom domu). Zatražila je da se podnese zahtjev za ocjenu ustavnosti Prijedloga Zakona, te da se skine sa dnevnog reda ove sjednice.

Na osnovu rezultata glasanja, predsjedavajući Doma naroda je konstatovao da Dom naroda Parlamenta Federacije nije prihvatio da se Prijedlog Zakona o izmjenama i dopunama Zakona o privatizaciji poduzeća skine sa dnevnog reda, jer je za glasalo 26 delegata, a 20 delegata je bilo uzdržano. Predsjedavajući Doma naroda predložio je da se uputi inicijativa predsjednici Federacije i premijeru Federacije da odluče da li će podnijeti zahtjev za ocjenu ustavnosti ovog Zakona, sa čim se Elvira Abdić-Jelenović složila.

Na osnovu rezultata glasanja, predsjedavajući je konstatovao da Dom naroda nije prihvatio da se Prijedlog Zakona o zaštiti od požara i vatrogastvu skine sa dnevnog reda, jer je za glasalo 15 delegata.

Potom se prešlo na glasanje o predloženom dnevnom redu.

Na osnovu rezultata glasanja, predsjedavajući je konstatovao da je Dom naroda, sa 47 glasova za, uz jedan glas protiv i uz tri uzdržana glasa, usvojio sljedeći:

## D N E V N I R E D

1. Prijedlog Zakona o izmjeni Zakona o budžetima u Federaciji Bosne i Hercegovine – skraćeni postupak,
2. Prijedlog Zakona o izmjeni Zakona o izvršavanju Budžeta Federacije Bosne i Hercegovine za 2008. godinu – skraćeni postupak,
3. Prijedlog Zakona o plaćama i drugim materijalnim pravima članova organa upravljanja institucija Federacije Bosne i Hercegovine i javnih poduzeća u većinskom vlasništvu Federacije Bosne i Hercegovine,
4. Prijedlog Zakona o izmjenama i dopunama Zakona o pravima izabраних dužnosnika, nosioca izvršnih funkcija i savjetnika u institucijama vlasti Federacije Bosne i Hercegovine (predlagač: Administrativna komisija Doma naroda) – hitni postupak,
5. Prijedlog Zakona o izmjenama i dopunama Zakona o privatizaciji poduzeća (predlagač: Klub zastupnika SDA u Predstavničkom domu),
6. Prijedlog Zakona o izmjeni Zakona o statistici u Federaciji Bosne i Hercegovine – skraćeni postupak,
7. Prijedlog Zakona o zaštiti od požara i vatrogastvu,
8. Akcioni plan prevencije i suzbijanja maloljetničke delikvencije u Federaciji Bosne i Hercegovine,
9. Izvještaj o radu Federalnog pravobraniteljstva u 2007. godini,
10. Izvještaj o realizaciji sredstava sa pozicije tekućih transfera za prvo polugodište 2008. godine,
  - a) Ured predsjednice Federacije Bosne i Hercegovine,
  - b) Ured potpredsjednika Federacije Bosne i Hercegovine
  - c) Ured potpredsjednice Federacije Bosne i Hercegovine,
11. Izvještaj o izvršenju finansijskog plana Federalnog fonda solidarnosti za 2007. godinu,
12. Informacija o vanjskom i unutrašnjem dugu Federacije Bosne i Hercegovine sa stanjem na dan 30.06.2008. godine sa zaključcima.

Predsjedavajući je predložio da se o 1. i 2. tački vodi zajednička rasprava, a da se izjašnjavanje obavi pojedinačno, što su delegati prihvatili.

**1. Prijedlog Zakona o izmjeni Zakona o budžetima u Federaciji Bosne i Hercegovine – skraćeni postupak**

**2. Prijedlog zakona o izmjeni Zakona o izvršenju Budžeta Federacije Bosne i Hercegovine za 2008. godinu**

Prijedloge zakona utvrdila je Vlada Federacije.

Prijedloge zakona obrazložio je Vjekoslav Bevanda, federalni ministar finansija.

U raspravi su učestvovali: Elvira Abdić-Jelenović, federalni ministar finansija Vjekoslav Bevanda, premijer Nedžad Branković, Svetozar Pudarić i Josip Perić, predsjednik Kluba delegata hrvatskog naroda.

Nakon rasprave, prešlo se na izjašnjavanje o prijedlozima ovih zakona.

**1. Prijedlog Zakona o izmjeni Zakona o budžetima u Federaciji Bosne i Hercegovine**

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 44 glasa i uz osam uzdržanih glasova, usvojio Prijedlog zakona o izmjeni Zakona o proračunima u Federaciji Bosne i Hercegovine.

**2. Prijedlog Zakona o izmjeni Zakona o izvršenju Budžeta Federacije Bosne i Hercegovine za 2008. godinu**

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 44 glasa i uz osam uzdržanih glasova, usvojio Prijedlog zakona o izmjeni Zakona o izvršenju Budžeta Federacije Bosne i Hercegovine za 2008. godinu.

**3. Prijedlog zakona o plaćama i drugim materijalnim pravima članova organa upravljanja institucija Federacije Bosne i Hercegovine i javnih poduzeća u većinskom vlasništvu Federacije Bosne i Hercegovine**

Prijedlog Zakona utvrdila je Vlada Federacije.

Predstavnički dom je na 16. sjednici, održanoj 23.09.2008. godine, usvojio Prijedlog Zakona u tekstu kako ga je predložila Vlada Federacije.

Prijedlog Zakona razmatrala su nadležna radna tijela i dostavila svoje izvještaje.

Na Prijedlog Zakona amandmane su podnijeli Klub delegata srpskog naroda i Mislav Sučić.

Amandman Kluba delegata srpskog naroda odnosi se na promjenu naziva Poglavlja III. i na dodavanje člana 12.a u Poglavlju III.

Mislav Sučić je podnio četiri amandmana.  
Amandman I. odnosi se na član 8. stav 1.  
Amandman II. odnosi se na član 10. stav 1.  
Amandman III. odnosi se na član 11. stav 1.  
Amandman IV. odnosi se na član 12.

Amandmani su dostavljeni Vladi Federacije radi izjašnjavanja.

Prijedlog Zakona obrazložio je Stipe Buljan, predstavnik Federalnog ministarstva finansija, koji je izjavio da je u članu 2. potrebno izvršiti **tehničku ispravku** i to tako da se u preposljednjem redu iza riječi "Hercegovine" veznik "i" briše i piše zarez, a na kraju teksta tačka se zamjenjuje veznikom "i" i dodaju riječi: "Komisiju za koncesije Federacije Bosne i Hercegovine".

Izjavio je da Vlada Federacije ne prihvata amandman Kluba delegata srpskog naroda, već da podnosi svoj amandman koji glasi:

**Amandman**

"U članu 6. u stavu 2. na kraju teksta umjesto tačke piše se zarez i dodaju riječi: "kao i članovi Regulatorne komisije za električnu energiju u Federaciji Bosne i Hercegovine, čija mjesečna netoplaća može biti utvrđena najviše u iznosu do pet prosječnih mjesečnih netoplaća isplaćenih u javnim elektroprivrednim poduzećima Federacije u prethodna tri mjeseca."

Također je izjavio da Vlada Federacije ne prihvata amandmane Mislava Sučića.

U raspravi o Prijedlogu Zakona učestvovali su: Željko Asić, Lidija Bradara i Mislav Sučić, koji je izjavio da ne odustaje od svojih amandmana.

Budući da Mislav Sučić nije odustao od svojih amandmana, predsjedavajući ih je stavio na glasanje.

Sa 44 glasa za, uz jedan glas protiv i uz dva uzdržana glasa, Dom naroda usvojio je:

**Amandman I.**

U članku 8. u stavu 1. u trećem redu, riječi: "isplaćenih u poduzeću" zamjenjuju se riječima: "isplaćenih u Federaciji".

Sa 40 glasova za i uz sedam uzdržanih glasova, Dom naroda usvojio je:

**Amandman II.**

U članu 10. u stavu 1. u četvrtom redu, riječi: “supsidijarnom poduzeću” zamjenjuju se riječima: “u Federaciji”.

Sa 43 glasa za i uz četiri uzdržana glasa, Dom naroda usvojio je:

**Amandman III.**

U članu 11. u stavu 1. u trećem redu, riječi: “supsidijarnom poduzeću” zamjenjuju se riječima: “u Federaciji”.

Sa 43 glasa za i uz četiri uzdržana glasa, Dom naroda usvojio je:

**Amandman IV.**

U članu 12. u stavu 1. u trećem redu, riječi: “u poduzeću, odnosno supsidijarnom poduzeću” zamjenjuju se riječima: “u Federaciji”.

Potom se prešlo na glasanje o Prijedlogu Zakona.

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 41 glasom za i uz šest uzdržanih glasova, usvojio Prijedlog Zakona o plaćama i drugim materijalnim pravima članova organa upravljanja institucija Federacije Bosne i Hercegovine i javnih poduzeća u većinskom vlasništvu Federacije Bosne i Hercegovine.

Kako je Prijedlog Zakona usvojen u različitom tekstu u oba doma Parlamenta Federacije Bosne i Hercegovine **potrebno ga je usaglasiti.**

**4. Prijedlog Zakona o izmjenama i dopunama Zakona o pravima izabраних dužnosnika, nosioca izvršnih funkcija i savjetnika u institucijama vlasti Federacije Bosne i Hercegovine**

Predlagač ovog Prijedloga Zakona je Administrativna komisija Doma naroda.

Prijedlog Zakona razmatrala su nadležna radna tijela i dostavila svoje izvještaje.

U raspravi su učestvovali Saša Magazinović, Elvira Abdić- Jelenović i Svetozar Pudarić.

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 42 glasa za, uz devet glasova protiv i uz četiri uzdržana glasa, usvojio Prijedlog Zakona o izmjenama i dopunama Zakona o pravima izabраних dužnosnika, nosioca izvršnih funkcija i savjetnika u institucijama vlasti Federacije Bosne i Hercegovine.

## **5. Prijedlog Zakona o izmjenama i dopunama Zakona o privatizaciji poduzeća**

Predlagač ovog Prijedloga Zakona je Klub zastupnika SDA u Predstavničkom domu.

Predstavnički dom je na nastavku 11. sjednice, održane 28.03.2008. godine, usvojio Prijedlog Zakona, koji je Klub zastupnika SDA dostavio 14.03.2008. godine.

Dom naroda je na 13. sjednici, održanoj 29.05.2008. godine, u prethodnom postupku odlučio da Zakon razmatra u formi nacрта i Zaključkom ga prihvatio.

Nakon toga Klub zastupnika SDA je 06.06.2008. godine dostavio Domu naroda novi tekst Prijedloga Zakona.

Prijedlog Zakona razmatrala su nadležna radna tijela i dostavila svoje izvještaje.

Prijedlog Zakona obrazložio je Ibrahim Nadarević, predsjednik Kluba zastupnika SDA u Predstavničkom domu.

Premijer Nedžad Branković izjavio je da podržava Prijedlog Zakona.

U raspravi su učestvovali: Muhamed Osmić, Lidija Bradara, Elvira Abdić-Jelenović, Tomo Vidović, Svetozar Pudarić i Ibrahim Nadarević, koji je u ime predlagača Zakona podnio amandman koji glasi:

### **Amandman**

U članku 17. iza stava 1. dodaje se novi stav 2. koji glasi:

«Iz stava 1. ovog člana izuzimaju se javna poduzeća iz oblasti elektroenergetskog sektora, telekom sektora, poštanskog prometa i željezničkog prometa.»

Dosadašnji st. 2., 3., 4. i 5. postaju st. 3., 4., 5. i 6.

Na osnovu rezultata glasanja, predsjedavajući Doma naroda je konstatovao da je Dom naroda, sa 31 glasom za, uz tri glasa protiv i uz devet uzdržanih glasova, usvojio Prijedlog Zakona o izmjenama i dopunama Zakona o privatizaciji poduzeća. Također je usvojio i sljedeće:

## ZAKLJUČKE

1. Zadužuje se Vlada Federacije Bosne i Hercegovine da u roku od 45 dana sačini prečišćeni tekst Zakona o privatizaciji poduzeća.
2. Zadužuje se Vlada Federacije Bosne i Hercegovine da u roku od tri mjeseca izradi novi Zakon o privatizaciji poduzeća i uputi ga u parlamentarnu proceduru.
3. Zadužuje se Vlada Federacije Bosne i Hercegovine da u roku od tri mjeseca sačini Nacrt Zakona o javnom dobru i uputi ga u parlamentarnu proceduru.

Nakon toga predsjedavajući je prekinuo sjednicu u 16.55.

### **NASTAVAK SJEDNICE, održane 22. januara 2009. godine**

Sjednica je počela u 10.30.

Sjednici je predsjedavao Stjepan Krešić, predsjedavajući Doma naroda Parlamenta Federacije.

Na početku sjednice predsjedavajući je pozdravio: delegate, predsjednicu Federacije Borjanu Krišto, potpredsjednicu Federacije Spomenku Mičić, premijera Vlade Federacije BiH Nedžada Brankovića, zamjenika premijera Federacije Gavriila Grahovca i ministre u Vladi Federacije BiH, predstavnike udruženja, međunarodnih organizacija, goste i predstavnike akreditiranih medijskih kuća koji prate rad sjednice

Izostanak sa sjednice opravdali su Jasenko Tufekčić, Zijad Tvica, Slobodan Tomić, Elvira Abdić-Jelenović i Fahrudin Skopljak.

Na osnovu evidencije Stručne službe, predsjedavajući je konstatovao da sjednici prisustvuju 42 delegata, što čini većinu, te Dom naroda može raditi i punovažno odlučivati.

Predsjedavajući je podsjetio da na nastavku 17. sjednice nije zaključena rasprava o Prijedlogu Odluke o imenovanju Upravnog odbora RTV Federacije Bosne i Hercegovine i predložio da se uvrsti u dnevni red ove sjednice kao posljednja tačka, što su delegati prihvatili.



Potom je predsjedavajući obavijestio delegate da su za nastavak sjednice preostale sljedeće tačke dnevnog reda:

6. Prijedlog Zakona o izmjeni Zakona o statistici u Federaciji BiH – skraćeni postupak,
7. Prijedlog Zakona o zaštiti od požara i vatrogastvu,
8. Akcioni plan prevencije i suzbijanja maloljetničke delinkvencije u Federaciji BiH,
9. Izvještaj o radu Federalnog pravobraniteljstva u 2007. godini,
10. Izvještaj o realizaciji sredstava sa pozicije tekućih transfera za prvo polugodište 2008. godine:
  - a) Ured predsjednice Federacije BiH,
  - b) Ured potpredsjednika Federacije BiH,
  - c) Ured potpredsjednice Federacije BiH,
11. Izvještaj o izvršenju finansijskog plana Federalnog fonda solidarnosti za 2007. godinu,
12. Informacija o vanjskom i unutrašnjem dugu Federacije BiH sa stanjem na dan, 30.06.2008. godine sa zaključcima,
13. Izbor i imenovanja.

## **6. Prijedlog Zakona o izmjeni Zakona o statistici u Federaciji BiH**

Prijedlog Zakona utvrdila je Vlada Federacije.

Predstavnički dom je na nastavku 17. sjednice, održane 29.10.2008 godine, usvojio Prijedlog Zakona u tekstu kako ga je predložila Vlada Federacije.

Prijedlog Zakona razmatrala su nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije jednoglasno (42 glasa) usvojio Prijedlog Zakona o izmjeni Zakona o statistici u Federaciji BiH.

## **7. Prijedlog Zakona o zaštiti od požara i vatrogastvu**

Prijedlog Zakona utvrdila je Vlada Federacije.

Predstavnički dom je na nastavku 17. sjednice, održane 29.10.2008 godine, usvojio Prijedlog Zakona sa tri amandmana koje je Vlada Federacije prihvatila pa su postali sastavni dio Prijedloga Zakona.

Prijedlog zakona razmatrala su nadležna radna tijela i dostavila svoje izvještaje.

Prijedlog Zakona obrazložio je predstavnik Vlade Federacije Alija Tihčić.

U raspravi su učestvovali: Josip Perić, Besim Imamović, premijer Federacije Nedžad Branković i Radoje Vidović.

Na prijedlog premijera Federacije odlučeno je da se odgodi izjašnjenje o Prijedlogu Zakona dok Ekonomsko-socijalno vijeće Federacije BiH ne obavi raspravu o Prijedlogu Zakona.

## **8. Akcioni plan prevencije i suzbijanja maloljetničke delinkvencije u Federaciji BiH**

Akcioni plan utvrdila je Vlada Federacije.

Predstavnički dom je na nastavku 16. sjednice, održane 29.10.2008 godine, prihvatio Akcioni plan prevencije i suzbijanja maloljetničke delinkvencije u Federaciji BiH.

Akcioni plan razmatrala su nadležna radna tijela i dostavila svoje izvještaje.

Akcioni plan obrazložio je predstavnik Vlade Federacije Hidajet Halilović.

U raspravi su učestvovali: Dženana Zlatar, Mira Ljubijankić, Sead Čaušević, Denis Zvizdić, Muharem Serbezovski, Bojan Bošnjak, Tomo Vidović, Edina Papo, Lidija Bradara, Muhamed Osmić, Ramo Isak, predsjednik Kluba delegata hrvatskog naroda Josip Perić, predsjednik Kluba delegata bošnjačkog naroda Alija Begović, Ivo Komšić i premijer Nedžad Branković.

Budući da je Alija Begović, ispred Kluba delegata bošnjačkog naroda, predložio Zaključak koji je pročitao, predsjedavajući je na osnovu

rezultata glasanja konstatovao da je Dom naroda Parlamenta Federacije jednoglasno (40 glasova) usvojio sljedeći:

## **ZAKLJUČAK**

Obavezuje se Vlada Federacije BiH da hitno, a najkasnije u roku od godinu dana uspostavi i stavi u funkciju institucije i ustanove predviđene Akcionim planom, a da o aktivnostima o provedbi plana obavijesti Parlament Federacije BiH u roku od šest mjeseci.

Na osnovu rezultata glasanja, predsjedavajući je konstatovao da je Dom naroda Parlamenta Federacije jednoglasno (40 glasova) usvojio Akcioni plan prevencije i suzbijanja maloljetničke delinkvencije u Federaciji BiH, uz obavezu da se plan promijeni i uskladi sa usvojenim Zaključkom.

### **9. Izvještaj o radu Federalnog pravobraniteljstva u 2007. godini**

Izvještaj o radu za 2007. godinu dostavilo je Federalno pravobraniteljstvo.

Predstavnički dom je na nastavku 16. sjednice, održane 28.10.2008 godine, Zaključkom prihvatio Izvještaj o radu Federalnog pravobraniteljstva.

Izvještaj o radu razmatrala su nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 39 glasova za i uz jedan glas protiv, prihvatio Izvještaj o radu Federalnog pravobraniteljstva u 2007. godini.

### **10. Izvještaj o realizaciji sredstava sa pozicije tekućih transfera za prvo polugodište 2008. godine:**

- a) Ured predsjednice Federacije BiH**
- b) Ured potpredsjednika Federacije BiH**
- c) Ured potpredsjednice Federacije BiH**

Izvještaj o realizaciji sredstava sa pozicije tekućih transfera za prvo polugodište 2008. godine dostavio je Ured predsjednika Federacije i uredi potpredsjednika Federacije.

Predstavnički dom je na nastavku 16. sjednice, održane 28.10.2008. godine, prihvatio Izvještaj o realizaciji sredstava sa pozicije tekućih transfera

za prvo polugodište 2008: godine - Ured predsjednice Federacije BiH, Ured potpredsjednika Federacije BiH i Ured potpredsjednice Federacije BiH.

Izvještaj su razmatrala nadležna radna tijela i dostavila svoje izvještaje.

Izvještaj je obrazložio predstavnik Ureda potpredsjednika Federacije Mirsada Kebe Mersudin Dino Šećerović.

U raspravi je učestvovao Ramo Isak.

Na osnovu rezultata glasanja, predsjedavajući je konstatovao da Dom naroda Parlamenta Federacije **nije prihvatio** Izvještaj o realizaciji sredstava sa pozicije tekućih transfera za prvo polugodište 2008. godine - Ured predsjednice Federacije BiH, Ured potpredsjednika Federacije BiH i Ured potpredsjednice Federacije BiH - jer je za glasalo 29 delegata, dok je osam delegata bilo uzdržano.

#### **11.Izvještaj o izvršenju finansijskog plana Federalnog fonda solidarnosti za 2007. godinu**

Izvještaj je pripremio Zavod zdravstvenog osiguranja i reosiguranja Federacije BiH, a utvrdila ga je Vlada Federacije.

Izvještaj su razmatrala nadležna radna tijela i dostavila svoje izvještaje.

U raspravi nije niko učestvovao.

Na osnovu rezultata glasanja, predsjedavajući je konstatovao da je Dom naroda Parlamenta Federacije jednoglasno (38 glasova) prihvatio Izvještaj o izvršenju finansijskog plana Federalnog fonda solidarnosti za 2007. godinu.

#### **12.Informacija o vanjskom i unutrašnjem dugu Federacije BiH sa stanjem na dan, 30.06.2008. godine sa zaključcima**

Informaciju je utvrdila Vlada Federacije.

Predstavnički dom je na nastavku 16. sjednice, održane 28.10.2008 godine, razmatrao Informaciju i primio je na znanje.

Informaciju su razmatrala nadležna radna tijela i dostavila svoje izvještaje.

Izvještaj je obrazložio predstavnik Vlade Federacije Tihomir Ćurak.  
U raspravi je učestvovao Mislav Sučić.

Na osnovu rezultata glasanja, predsjedavajući je konstatovao da je Dom naroda Parlamenta Federacije, sa 37 glasova za i uz jedan glas protiv, primio na znanje Informaciju o vanjskom i unutrašnjem dugu Federacije BiH sa stanjem na dan, 30.06.2008. godine sa zaključcima.

Prije prelaska na sljedeću tačku, predsjednica Kluba delegata srpskog naroda Mira Ljubijankić je, ispred Kluba, zatražila pauzu.

Nakon pauze, Mira Ljubijankić je izjavila kako je stav Kluba da se podtačka b) Prijedlog Odluke o potvrđivanju Odluke o imenovanju sudaca Ustavnog suda Federacije BiH skine sa dnevnog reda jer Komisija za ustavna pitanja i Zakonodavno-pravna komisija nisu razmatrali ovu tačku.

### **13.Izbor i imenovanja**

#### **a) Prijedlog Odluke o imenovanju Upravnog odbora RTV Federacije Bosne i Hercegovine**

Predsjedavajući je podsjetio delegate da je Predstavnički dom na nastavku 17. sjednice, održane 16.12.2008 godine, razmatrao svoj prijedlog kandidata za Upravni odbor RTV Federacije Bosne i Hercegovine i prijedlog nije dobio potrebnu većinu glasova zastupnika.

Predsjedavajući je podsjetio delegate da rasprava o ovoj tački nije zaključena, te je otvorio daljnju raspravu.

U raspravi nije niko učestvovao.

Na osnovu rezultata glasanja, predsjedavajući je konstatovao da Dom naroda Parlamenta Federacije **nije donio** Odluku o imenovanju Upravnog odbora RTV Federacije Bosne i Hercegovine, koju je predložila Komisija za izbor i imenovanja Doma naroda, jer je za Odluku glasalo 26 delegata, šest je bilo protiv, a sedam delegata je bilo uzdržano.

#### **b) Prijedlog Odluke o potvrđivanju Odluke o imenovanju sudaca Ustavnog suda Federacije BiH**

Odluku o imenovanju **Andrije Kolaka** i **Vere Jovanović** za suce Ustavnog suda Federacije BiH donijela je predsjednica Federacije, uz saglasnost potpredsjednika Federacije i dostavila ga Domu naroda radi potvrđivanja.

Predsjedavajući je podsjetio delegate da je Klub delegata srpskog naroda predložio da se ova tačka skine sa dnevnog reda.

Potom je pozvao predsjednicu Komisije za izbor i imenovanja Doma naroda Daliborku Milović da obrazloži Izvještaj Komisije.

Predsjednica Komisije obavijestila je delegate da je stav Komisije da se zaduži Komisija za ustavna pitanja i Zakonodavno-pravna komisija Doma naroda da u roku od 15 dana dostave Komisiji za izbor i imenovanja Doma naroda mišljenje da li je Odluka o imenovanju sudaca Ustavnog suda Federacije BiH, koju je donijela predsjednica Federacije BiH - uz saglasnost potpredsjednika Federacije BiH, u skladu sa Ustavom Federacije BiH i Zakonom o Visokom sudskom i tužiteljskom vijeću Bosne i Hercegovine.

U raspravi su učestvovali: Pero Jukić, Svetozar Pudarić, Lidija Bradara, Nikola Simić i Mira Ljubijankić.

Nakon rasprave, predsjedavajući je dao na glasanje prijedlog Komisije za izbor i imenovanja i, na osnovu rezultata glasanja, konstatovao da je Dom naroda Parlamenta Federacije, sa 35 glasova za, uz četiri glasa protiv i uz četiri uzdržana glasa, usvojio sljedeći:

## **ZAKLJUČAK**

Zadužuju se Komisija za ustavna pitanja i Zakonodavno-pravna komisija Doma naroda da u roku od 15 dana dostave Komisiji za izbor i imenovanja Doma naroda Parlamenta Federacije BiH mišljenje da li je Odluka o imenovanju sudaca Ustavnog suda Federacije BiH, koju je donijela predsjednica Federacije BiH, uz saglasnost potpredsjednika Federacije BiH, u skladu sa Ustavu Federacije BiH i Zakonu o Visokom sudskom i tužiteljskom vijeću Bosne i Hercegovine.

Sjednica je završena u 13.54.

Transkript sjednice čini sastavni dio Zapisnika.

**SEKRETAR**

Izmir Hadživdić

**PREDSJEDAVALAČI**

Stjepan Krešić